

文靖公詩鈔

自序

昔蘇子由謂史記疎宕有奇氣良然良然余尤愛項羽
本紀筆勢奇縱生氣勃勃如怒龍因攜之行笥以快觀
覽而豁積悶乃出都門赴昌平來車顛簸不可耐目光
閃灼不克翻閱遂置之覺山川雲物目中無非詩者逐
程吟咏所積遂多殆出大境門胸次豁然用筆益恣肆
無繩墨入瀚海界過蘇武牧羊處慨然想見其爲人而
又深惜其以典屬國終也夷考其時衛青張安世輩或
以世胄濫勲名或以戚里獵卿貳諸臣媚子接踵而至
剛鯁如汲黯武帝所不冠不見者且高臥淮陽老矣若

子卿則又何說然卒繪象麟閣聲光與霍子孟埒此又
天理之常存而人心之不死也雖然漢鼎久移閣於何
在得意諸貴倖已湮沒而弗彰孰意荒煙蔓草中千餘
載後猶存其吞氊遺跡相與稱道於不衰斯豈西京君
若相所能遏抑也乎北齊斛律光一武夫耳而忠勇性
成敕勒一歌光氣熊熊佔俾腐儒當舌橋而不能下洵
賀六渾諸臣中豪傑士也攬轡所經見水草蒼茫牛羊
滿谷與歌意宛合征軺歷碌興會所至爰與瀚海并賦
之燈下無事草錄成帙分紀程草及塞上吟都爲二冊
賦者古詩之流也亦附於末馬遷有知或不至笑我爲

不諳體例也則幸矣咸豐四年九月重陽後五日吉林
佩蘅寶璽自題於喀拉沁部之孟格圖行臺

夫飛狐絕塞蒼涼傳橫吹之聲飲馬長城辛苦譜從軍
之曲古之人鳴鶻距驢之山弭節蠓螭之塞亦謂馬非
西域不號龍駒人到朔方都稱猿臂若乃拜芝坊之
簡命極蔥嶺之勝游遼海陰山有終古未銷之雪秦關
漢月歷中華以外之天此我佩蘅夫子三音諸彥紀
程草所由作也方其邊巡甌脫界出閭浮重譯煩胥象
之通一路警鳴騶之唱車驅絕徼威分半虎之符樓築
臨邊妙運全牛之力斯時也三邊韎韐瓊帳宵陰八月
交河驚砂暮語旗懸落日唱數疊之婆駝鞭打旋風舞
當筵之回鶻鵝鰓盡懷

北闕犢牛俱向南眠我 夫子揚厲

堯襟恢張漢約富文忠馳驅邊塞每攜溫詔而來諸葛

公祭告瀘川親灑摩崖之筆

集中有祭鄂博文

二百人吹蠡享

使卅六所置驛傳詩已申白馬之盟詞爰采黃麐之樂

府涼州曲罷則蘆管齊鳴冰窖寒深而筆花不落振策

則秋容慘白拾路則巖氣純青每當朔吹騰空繁星出

地兀金鞭以敲夕拍銅斗以哦晨萬葉鑒秋呼來好句

一鐙搖夢催墮邊聲聆笳拍代擊鉢之音借雪嶺飽詩

囊之料嚴霜行幄寒生拓跋城邊枯草輪臺親到高岑

詩裏所以狂飛虎僕碎嚼麋丸落紙春風出玉關而不

斷倚天詩筆峙銅柱而爲雙匪徒折柳之歌豪抑亦請
纓之氣壯也若乃臺訪赫連城規鐵伐苔繡前朝之鏃
雲沈故將之營沙磧天遙問燕支之顏色節旄雪飽弔
羝乳之山川元太祖龍起之鄉可尋戰壘漢將軍燕然
之頂尙有碑文冢起祁連猶憶休屠之祭驛荒土木閒
談雨帝之謠往往傾尉遲之杯發廣武之歎駐使節而
峯迎馬背灑墨汁而紙盡羊皮但聞琵琶版高吟不管鬼
神欲泣至如山名鄂博日號那蘭杭靄青浮草心紅吐
拭雷劍而評眞僞呼蠟蓋而辨濁清莫不飾之靈藻補
入輶軒鞞獻魚支深目識李陵之裔杯斟獅乳嗅地避

斛律之風斯則續風土之編詎同鑒空聽姬禹之語如
讀奇書者矣且夫龍庭路簷雁磧天長秋戍笳鳴激壯
士登城之嘯夜郎地遠極才人橐筆之游亦且霧掃旄
頭墨磨盾鼻況乃飈輪迅擁電策豪揮警半夜之雞聲
銜

九天之鳳詔龍城百仞玉勒巡邊貂帳千鎧紫衣行炙
國斥癸辛之界屯開戊己而遙不必石刻金川篇成青
海而早已穹廬知張鷟之名弓衣織宛陵之句一枝斑
管掃清瀚海煙痕萬里詩城築出崑崙山外而或謂秋
來砧杵易觸鄉心曲裏關山每多苦調豈知柳雪驅馳

簡書鞅掌蓋將貢藝通道綬萬國之輿圖非徒立馬揚
鞭雄九邊之顧盼故能瞻雲奏律絕地通天頌聲和槃
木之狼樂府陋紇干之雀指羶廬而露宿刁斗三更助
敕勒之豪吟蒲萄一斗冰呵墨澹喧傳倚馬之詩弓勁
風鳴健入賦雕之筆部旣分乎鷹庇俗更問夫狼臙榆
塞奇峯時聞叱馭梅花羌笛不賦邊愁乃卿月階高異
域幸瞻彥博而使星槎去璽書旋召張騫於是編次游
蹤披敞副墨夢天邊之蒲類墮指上之黃河腦後腥風
作大澤餓鳴之叫卷中舊雨半北平射虎之人用以冠
冕河山彈壓邊覺仗筆墨以鎮川嶽留文章以耀窮荒

則是編也殆我 夫子神化之丹青而綬來之槩券也
乎錦陸氏莊荒幾同樗散中郎爨冷深負桐知樞衣偶
接乎程門侍坐命彈夫點瑟許公手筆藻耀本冠三唐
端木肩牆美富遑知數仞五屬國盡尊漢使不徒侈擁
傳之游兩出塞追壓杜陵請視此籌邊之集咸豐己未
嘉平既望受業古吳徐錦謹序

寄心盦詩話一則

江都 符葆森 南樵

三音諾彥在瀚海北瀚海界爲蘇武牧羊地寶佩蘅侍郎奉使過此瀚海賦考核精詳爲千古未有之作其塞上竹枝詞所紀風土如讀異書崇君樸山贈侍郎詩云出塞非尋前代蹟登高眞見大夫才庶不虛此皇華遠道也

題辭

徐桐蔭軒

寒冰沍地霜滿天驚飈亂撲輪躑頭龍沙萬里眞袤延
絕塞一望無人烟金門上客蓬萊仙羶廬兀坐逃詩禪
月琯再周秉節旋入門興會何翩翩牛腰新稿束一編
展讀未竟頻驚筵淋漓大筆揮如椽是何氣韻雄且妍
豈惟古調彈幽絃新詞直欲追唐賢就中研鍊京都篇
擲作金石聲聲圓良由腹笥撐便便能將俗眼爲洗漣
有時撫景窺靈詮雲山經用皆明鮮有時刻畫工鑱鐫
舌端粲漫生青蓮有時含毫意邈然超乎象外忘蹠筌

有時新語紛蟬聯餘味醞釀猶馨壇

稿中偶以蒙古語聯綴成句語甚新

奇

阿誰對此羅丹鉛爭鈔萬本手爲胼人生苦被塵勞

牽飛蛾赴火繭自纏名場傾軋尤便儼萍水相逢盡脅肩
論交漫託金石堅翻雲覆雨倏目前洪波直上崑崙巔
簫鼓播弄徒譏譏嘈雜聒耳如蜩蟬顧我鐵硯磨將穿
春秋卅六猶速遭所幸寄託惟廉泉與世無競無憎憐
那禁鴟嚇垂饒涎感君結交二十年心如皎月臨清川
紫芝眉宇鄙吝蠲輒復同尋翰墨緣苦吟不輟窮鑽研
睹君奇製輝華箋學士不愧名青錢作歌聊與爲纏綿
敢云馳騁交戈鋌蛙鳴蚓唱慙拘攣引杯起舞應蹁跹

蹊倚醉笑指銀河邊乘槎使者漢張騫

輪臺八月風蕭蕭，敕勒歌罷天爲高。
金鞭兀夢耿秋夕，笳聲吹緊霜林凋。
玉關不度春風過，輪蹄枯草驚商飈。
昂頭天外脫塵鞅，芥蒂一洗胸中消。
西風卻掃繁華盡，芙蓉插遍凌九霄。
雄關點綴皆畫稿，詩囊料理橫牛腰。
陰山策馬騁冰雪，雄心未盡思寶刀。
是時望氣占關尹，豈知旌節來星軺。
邊風吹出高岑句，美酒一斛觴蒲萄。
澆我硯礪百愁并，濃磨墨瀋同沙淘。
荒徑古驛夜行峭，長風吹作雨帝謠。
李陵臺畔一坏土，餘怒激與風林鏖。
古來不少英雄淚，海上零落蘇卿旄。
牧羝千載空寂寞，遺節猶傲金張貂。
凍合冰窖筆花舞，詩魂經鍊窮秋毫。

驚砂暮語鬱蒼莽況有酬唱聯同僚杜陵一去空年少
秋風誰作出塞豪自非骭髀抱奇骨眉輪欲轉心旌搖
摩天鉅製鎮鄂博擎盃欲向蒼煙澆酒龍詩虎突飛騎
玉虹夜吼驚山魑燕支塞外少顏色羊酪駝羹同腥臊
秦關漢月勝遊在冰天躍馬風蹄驕草心紅吐勒蘇色
鵲聲乾噪迦陵巢駉驢陰翳入吟嘯一日傳誦雞林郊
歌呼甌脫巡砂磧風煙欲起瀚海蛟長城飲馬我無分
十年悔守門限牢當時若教侍吟席橐筆應許塞上遨
孤鐙對影夢行幄背癢忽來仙爪搔卽今杭靄青留望
未忘使節相招邀弓衣織遍燦雲錦碧紗籠處凌風騷

輶軒當日采風過問俗一例諮芻蕘澄清攬轡副

簡命漢家使者仙人曹己未季冬下浣受業蔣珍謹題

奉使三音諾彥記程草卷一

吉林寶

到昌平州作東進英誠公緒齋

八月
一站

初出

皇都第一程萬山蒼翠入燕平羲和馭正高西陸

秋分
次日

杜甫詩新賦北征太史自甘牛馬走上宮欣聽鳳鸞鳴

緒齋工詩并
以和友詩示

吾曹誰是裴中令地主勞勞愧送迎

曉發昌平

初四
日

於役敢辭勞流觀引興豪一州如斗大萬嶺插天高爽

氣分紈扇

是日甚熱
扇未去手

雄心託寶刀峻嶒望南口孱弱笑

詞曹

關溝

昔年聞蜀道今日見關溝少人而多石吾思柳柳州

又

一線郵程萬仞崖嵯峨怪石虎牙排泉聲每到紆時振
山色多於轉處佳紅縐黃團開畫本

山家棗熟瓜萎白有垂簾牆外者

雲蒼靄入詩脾行滕輕駛齊飛鳥合有蓬壺舊侶偕

山凹時見羣羊戲成絕句

夕陽明滅寫丹黃點綴山坳幾白羊大笑名園隨處有
小兒坡指午橋莊

居庸關

第二站
四十里

疊翠久知名芙蓉秀削成盤紆地思縮奇險天爲驚識

路龍文健

亂石欹滑馬若能循故步者然

摩雲鶴背平北門誰鎖鑰寇

準緬干城

居庸旅夜

古驛驂騑路深山蟋蟀秋

蛩音滿山

涼宵成旅況遠想在

皇州兄弟聚情話馳驅念遠遊何當速返轡次第說征

郵

居庸道中

初五日

居庸古雄關睥睨摩穹蒼溪澗潺湲流細徑詰曲長惟

恨多怪石森立神披猖欹仄礙人足回旋遲馬繯肩輿
稍節勞高下時簸揚熟思無一可鞭撻須秦皇或言驅
除苛未及變化良我意倣初平一叱皆成羊仙仿白石
生貴同李贊皇肆筵供大嚼牙慧留芬芳山靈顧我笑
君願非難償今正使龍塞柔毛以爲糧日日烹肥鮮鼎
俎紛羶薌見石而朵頤饒吻洵殊常余也情怡然愚公
愚何傷操蛇神有無請與觀太行

由岔道經榆林驛之懷來縣

第三站
八十里

崎嶇旣經歷開朗娛心神山遠低於樹雲輕細若鱗榆

林勞驛卒

地屬懷來
打尖換馬

藥草問旁人

道左紫花垂鈴意是
桔梗問之殊無知者

莫訝征途暇吾生慣苦辛

懷來策馬戲作

初六日

四野雲山豁遠眸一鞭斜控紫驄路人
不識皇華使

悞認當年馬少游

馬太款段至石佛寺換車

過土木驛

是時風雨大作

黑雲吹雨野烟綠疑有前明戰鬼哭英宗底事衽金革
遺跡至今說土木朱家累葉尊姦璫千乘萬騎成羈王
雲閒天子忽推落御衣蒙徧征塵黃伯顏歡擁北方去
飽聽胡笳蒙古語城隍雨帝妖讖符歸來位以奪門據
吁嗟明帝眞貪天子少保亦何罪愆卻將死事祠王振

定以生還德也先陳跡荒涼四百載張曹靈爽依稀在
英公張輔學士曹爾出使我偕英誠公前後頭銜宛相
均於土木殉節者對今古安危迥不同幸荷

聖主德帡幪魂魄有知應歎息四山颯颯來淒風

懷來道上卽事

西風瀟颯不勝情歷碌輪蹄又幾程一代君臣悲土木
爲正統惜尤爲四山雲日互陰晴此晴彼陰實爲妙景路經古堠

神俱往人遇涼秋感易生雉堞參差間何處僕夫傳語
報沙城

雨中過保安

最喜前途報嘉名是保安客中間吉識風雨不知寒

宿雞鳴山驛

第四站
九十里

雞鳴山古石嶙峋驛路停車孰主賓起念總宜詳舜蹠
度關隨在有齊秦紙窗風戰攪秋夢苔砌月涼驚旅人
風掃雲開
喜見新月
慚愧清剛劉越石著鞭碌碌走征輪

老龍背

初七日

驪龍抱珠眠象占艮其背蜿蜒洋河流潛伏幾千載黃
噴浪花粗碧縈石髮碎胡不速奮飛而乃自恬退功業
作霖雨聲名滿燕代想深老氏學遠邁蛟螭輩我銜使
命來行行赴紫塞亦若踏金鰲汝應作山戴一笑發狂

歌野雲低鬢黳

響水梁口號

響水堡西 宣化府第五站六十里

響水梁邊日未斜白雲碧樹莽無涯使星瀟灑山靈笑

摘取巖前野菊花

時命曹祥折石隙菊花嗅之

由宣化過榆林

又一榆林

赴張家口

初八日 第六站六十里

吹面北風涼驅車赴朔方沙平垂碧柳田晚簇紅梁燕

塞狼烽古秦城雉堞荒通橋見官守

都統副都統均恭請聖安遠

勝賦河梁

南關道移寓邊路街

初九日住張家口

連朝電掣急鋒車隨寓能安笑客槎漫詔嫖姚歌出塞

竟如宏景誌移家勞人就道意常適仙侶同舟心匪遐

與緒齋公館相近

居是對門便過從教余渾忘洛陽花

緒齋評騰游女

因亦以此語謹之

修治杆軸口占

初十日住張家口

久聞駕杆車今初見奇器堅久利遠行圓轉總如意

上下堡諸君子相得甚歡詩以誌之

十一日住張家口

聖朝柔遠固藩籬秋色撩人八月時帽影鞭絲皆入畫

山程水驛好吟詩腰懸金印欽裴度

謂華西巖慶石樵雨都統

胸秘

珠囊羨左思

緒齋自云構思甚遲想謙詞耳

自笑書生有頑福天涯相

遇總相知

慶石樵都統慶禧堂關部松子信左司皆京中舊雨新知者爲協領阿肅齋分府德輝山

驛道德
仲詩

寫家書後再疊前韻

雁入遙天菊繞籬行程欣遇鄭當時

阿肅齋有義烈風

偶於供

頓觀郵政敢以賢勞續雅詩窗燭紅搖孤館夢庭花翠
裊故園思秋心無限渾難罄應有閒階蟋蟀知

與石樵緒齋兩君子武弁旅館夜話

壯氣拄乾坤炎炎賦大言忘形相爾汝出話異寒暄月
夜邊聲肅星輶

帝命尊諸奴渾不解縮首睡昏昏

見秋海棠作

十三日
住張家口

楚楚嬌無那西風八月秋不因地邊塞少減態輕柔梓
里縈鄉夢花神訝遠游來時海棠初開何此之相似也故人邀客醉渾
似在

皇州

時慶禱堂
關部召飲

路遇鄉人賽社適演武劇戲成一律

庸碌偶登場雄風吹大王鬚眉原冒濫旌旆自飛揚豈
是楊無敵渾疑石敢當似君眞負腹搔首問穹蒼

旅館偶成

十三日
住張家口

手握

天家銅虎符征輶暫憇總恬愉人逢鄉里情懷洽詩到

邊城氣象粗行萬里程酬遠志熟重譯事勵宏圖高公

羊酒真雄放自笑詞林學勇夫

用高敖曹詩意

緒齋誦近作有炊烟隔樹青句因押青字以誌之

十四日

住張家口

驛路緬頻經長亭接短亭烟沉龍塞紫山擁馬蹏青圓

影瞻卿月

明日中秋節矣

寒芒說使星解人問何許響答有檐

鈴

出大境門策馬至陀羅廟

十五日

重山盤鬱勢縱橫風裊吟鞭欸段行紅閃夕陽鴉背遠
碧翻流水馬蹏輕邊人質直思醇古秋色澄鮮接太清

卻笑焚香陶賴廟

廟碑有陶賴字

僧伽禮拜解承迎

廟僧請安事近可笑

由陀羅廟之察汗陀羅蓋

第一台白頭八十里

譯言

陀羅廟西石徑粗平沙莽蒼路盤紆塞民縱轡駛羣馬

山犬吠門迴野狐

五十家子遙西見一野狐幾與驢埒背純黑前肩紅色山犬吠之

豈

有功名矜衛霍祇緣藩翰重劉盧

三音諾彥汗策凌尙純愍公主今所致祭

者或謂卽其後裔

初程所見已奇崛擬畫氍毹裘出塞圖

察汗陀羅蓋中秋小酌

銀漢聽西流高寒迴不猶空山孤館月佳節異鄉秋誰

著塵中想時昂天外頭良朋紅友共隨在總優游

時與緒齋

飲同

過大壩之布爾噶蘇臺

十六日第二台
譯言有樹六十里

大巴漢嶺高入雲我今策馬入雲裏四圍天地青旋螺
數點牛羊黑聚蟻自笑拘文牽義人心境開朗頓如此
前程萬里定何如目空一切自茲始

宿海流台

第三台
五十里

海流曾詠辟雍詩肇錫嘉名問幾時荒草滿庭黃土壁
敎人凝望有遐思

詠駕杆車

自布爾噶
蘇臺乘之

閃電走平岡雙輪轉軸長共誇車迅急全賴馬調良杆
直疑虹互驂齊等雁行馳驅真有力欹側亦無妨雲樹

看流水風烟接大荒但教嚴轡策所向總康莊虎脊來
西極龍沙碾朔方綏藩欣駕馭致遠効匡勳

曉赴鄂羅胡篤克

十七日第四台
譯言多井七十里

市地黃沙遠連天白草肥一車平若砥兩馬駛如飛山
坦渾無險風寒漸有威鄂羅胡篤克入望忽依稀

蒙古包早尖

鄂羅胡
篤克

連朝行紫塞天覆似穹廬今日穹廬坐渾淪開闢初小
兒蒙古語咿呀如起居賜食解跪拜質樸知有餘因思
太古世血飲而毛茹顧此醇醑風何不焚詩書一笑吟
短什結習仍未除

路見石堆

蒙古謂之鄂博
禮拜極虔敬

幾曲坡陀石數堆長繩搖曳綵旛開

中堆特高杆上有
旛兩旁繩曳綢條

纓纓

太蒙制度渾難識疑有山靈數往來

奎蘇土間眺

第五台 譯言
多木六十里

義取多林木於今不可稽四邊平野闊一覽眾山低潑
雪分牛乳臨風聽馬嘶曠觀真別趣何敢說栖栖

扎哈蘇曉行

五夜策僮僕行行皆平坡雲淡抹蒼靄月涼低絳河前
驅屢出沒遠勢迴盤陀言赴多魚處奈無丙穴何

路過
一河

又一淖爾水大十餘
畝究未見有魚也

早尖遇扎將軍南山紀綱

扎哈蘇

將軍猶健飯身喜說康強聞自貢馬僕頓教行役忘道途述杭靄大雪秋飛揚

云杭靄西已大雪

珍攝動深念思患期

預防

宿鳴愛

第七台 譯言千里六十里

底事轟傳千里名想因決勝有威聲木華黎輩知何處
荒草西風大野平

曉赴齊齊爾土

十九日第八台 譯言齊整八十里

眼前道路皆平坦塞外風雲自偉奇近鄙已畫察哈爾
察哈爾內遺民欲問青吉思

蒙古多元太祖裔

常懷捧日令狐

楚忽學戴星巫馬期斯士信美說齊整亂頭粗服總相

宜人多鳩形鵠面不
知齊整者安在

青岱

第九台
九十里

大山環抱小山重草色狐黃石氣濃九十里中無一物

問宜幾許子男封

子男五十
里耳呵呵

早赴烏蘭哈達

二十日第十台
言紅石一百二十里

荒烟四市冷雲屯略辨晨光賦載奔風雨聲中車似水

坡陀路上草成墩紅升滄海那蘭

日也蒙
古語

大碧聳遙山

鄂博尊百廿里行疑頃刻馳驅聊以答

君恩

奔巴圖

第十一台 譯言有墳八十里

古人不封樹龍沙乃近之茲獨標厥名罕有以爲奇我
來見荒原此說恐支離或類黑白墳禹貢同傳疑穹廬
斂神坐曠莽空遐思

由奔巴圖至沙拉哈達過布魯圖晚宿鄂嵐胡篤

克

二十一 日第十二台 譯言黃石七十里第

十三台

譯言青山五十里第十四台

譯

言多井五十里站小車急到宿處日甫西斜快甚

昨望山重翠今朝踏翠行意想所未到超越實堪驚得

地蒼鷹健

沙拉哈達山坡立一角鷹甚雄

連雲白草平喜逢多井處好

與聽瓶笙

烏拉契有以喇嘛充者察汗胡篤克道上戲成絕

句

二十二日第十五台
譯言白并九十里

早悟禪家大小乘星軺迅急等飛鵬前身想是阿羅漢
奔走黃衣笑眾僧

早尖後赴沙拉木楞

第十六台
譯言黃河六十里

白井接黃河匆匆走馬過羽蟲佳渾勁鷹日將種尉遲

多遠派崑崙水雄風敕勒歌笑余孱弱甚飽飯邈廉頗

連日頗思蔬品管城子
無食肉相也能不輟然

四馬駕杆其行益速赴鄂拉胡篤克作

二十三日
第十七台

譯言上井
一百四十里

天下快事那有此一轉瞬間百餘里兩驂如舞兩服襄
三代兵車或近是眼望翠嶺高入天倏忽已超鷹隼前
霜蹄蹴踏沙石響風生耳後霏雲烟紅白草墩大於盎
纍纍徧野列星象迴旋避之妙用柔豈止吳兒工蕩槳
從來峻利多粗豪脫杆偶亦差分毫寄言左右烏拉契
銜勒端宜把握牢

台章蓋有與元太師同名者戲贈

大元史冊永昭垂忠烈彰彰有太師脫克脫今爲下吏
始知功德在人爲

到吉斯洪果爾作

第十八台 譯言
紅黃土堆八十里

鄂博高堆石云何土亦堆紅心豐草擁

草色嫣紅塞人呼爲賀勒蘇

黃暈亂沙培勁氣生羶幄豪情託酒杯單于臺是否指

點嶺雲隈

西拉木霍哩卽事

二十四日第十九台譯言生鐵一百里

昨宿吉斯洪果爾驚聞石磴鬱崔嵬

彥將軍日記今朝謂山陡石亂

清曉征輶發萬仞奇峰大路開鄂博疑人籠月立昆都

駱馬拂雲來

安台昆都名拉什彭楚克

胸中頓益雄豪氣難易從茲

莫預猜

早尖赴布籠路摘金桃數枝

第二十台一百三十里

黃拂嶺雲高誰云地不毛蟠根依鐵礦

西拉木霍哩迤西山嶺上下極

多辨類識金桃彩煥弓衣貴

金桃皮弓例有明禁

圍誇箭鏃牢僕

夫渾不解絮語樂陶陶

赴蘇吉布拉克

二十五日第二十一台
譯言跨泉一百二十里

桃色金黃草色紅四山烟靄翠濛濛無邊爽氣生眉宇
點綴征輶入畫中

風掀沙石欲飛鳴馬驟車馳數驛程喜見遙山叢薄裏

兩株老樹拂雲生

自過大壩始見此樹一孤生一雙桎
相隔數十里不識何樹或日榆也

謁蘇吉廟

雅穆達
噶佛

蘇吉廟前流水斜慈雲頂禮徧龍沙追隨章蓋知崇信

爲說當年宗喀巴

宗喀巴係達賴班禪之師札章蓋隨
侍因爲演說以示尊崇黃教之意

陀黎布拉克茶尖

二十六日第二十二台 譯言鏡泉七十里此地向多蛇蒙古

呼爲木訛有慈蔭寺乾隆年間奉 敕建

木訛說蜿蜒停車暫息肩穹廬牛糞火活水馬跑泉

內大

臣馬思哈率兵征噶拉丹出張家口噶拉丹謂我兵所至泉湧芻生或卽此泉耶問之該台章蓋等茫無所知

古寺瞻金相遙峰挹翠烟

湛恩思

聖祖慈蔭普窮邊

仁皇帝親征準夷靖喀爾喀三汗之難爲古今所未有 大略

推超勇奇功許獨賢

大創準夷三音諾彥汗超勇親王策凌功爲最 至今安牧

蓄隨處聽旬宣蒼莽尋遺跡低徊溯往年更期人作鏡

懷古意茫然

圖古里克途中

第二十三台 譯言
路遠二百二十里

路遠原從譯語聞勞人應笑意如焚白凝低巘羊疑石
黃捲平沙馬箭雲故里情懷閒處覺涼秋景色望中分
郵書欲達何由速指點遙天有雁羣

五夜啟行聞緒齋未醒戲成絕句

二十七日

萊公當日睡澶淵今日英公亦宛然一枕瞢騰曾夢否
翠華街畔月華圓

穆哈里喀順途中口占

第二十四台 一百里瀚海界

涼月隨車曙色催我今喜到古龍堆碧沉翠草烟痕擬
紅透雲花日影來貔虎無聲依劍珮驂騑有力挾風雷

策凌已遠空沙漠屈指誰爲上將才

早尖赴豁泥契

二十五台 譯言牧羊傳爲蘇武牧羝處一百二十里

雲白低垂野沙黃遠入天水難尋淖爾山已近燕然

杭

爲古燕然山支麓

壯節懷蘇武餘風問左賢停車暫留宿雅興

付吟箋

飲酥戲作

沁齒勝雲漿豪情喜朔方椎牛思李牧飲乳笑張蒼得
趣茶新熟回甘蔗共嘗穹廬雅相稱門外野風涼

詠蒙古包到畢勒格庫作

二十八日第二十六台又名那朗一百里

爪牛廬式結團欒不畏龍沙風雪寒托足每欣行路易

昂頭應笑得門難圓光頂上神明鑒

頂有天井

超想環中夢

寐安

宿皆套包如連環狀

擬仿穹蒼成廣廈

斛律金歌意

華夷覆幬總

臚歡

哈薩布齊偶成

第二十七台門帶一百二十里

譯言

道存不下帶政出防多門古人有成憲誦法窺淵源驅

車過瀚海聞名思細論此意向誰說斜日明荒原

詠游牧蒙古包

塞上有遠看一坐墳近看卻有門

言真堪失笑矣因作此代包中人解嘲

牛羊子女共盤桓物與民胞眼界寬更有神仙風趣在

一家雞犬漢劉安

風雪夜坐

行李終夜未至

香泛紅螺酒消寒意自如雲山圍瀚海風雪坐穹廬振

耳驚沙石關心爲簡書故園誰念我兄弟樂康居

梅谷兄爲

大宗伯三弟五弟均在家讀書卽介田在汴亦無此苦況

曉晴赴扎拉蘇

二十九日第二十八台八十里

朔風怒吼驅滕六添出今朝奇景多雲腳日烘金錯綵

山腰雪點翠成窩川源厯厯心彌壯歲月匆匆鬢欲皤

昨日覽鏡鬢已添白

太息子卿畫麟閣此閒旄節幾消磨

因蘇武念及李陵作此弔之

可憐飛將後竟作降將軍遺塚問何許天山空碧雲

赴哲博勒天寒嶺複感而有作

第二十九台八十里

西風吹雪上貂裘星使何如占益州山勢寬平全作地
冬心謹肅已忘秋詩情擬續洗兵馬劍氣應教射斗牛
放眼龍堆最高處材官走卒笑鳴騶

博勒鄂博早尖

三十日第三十台
譯言石堆八十里

高名傳鄂博岳峙秀亭亭風古天難問山空石有靈我
來暫棲息雅詠誌曾經仍叱王尊御馳驅莫暫停

反行路難

風因積雪寒逾峭人到穹廬煥且安曾說隆污從大道
可知天地本齊觀奔雷策馬忙騶卒逐日烹羊勸飽餐

素位而行行自得何嘗行路有艱難

遇庫特勒多倫

第三十一台
言拉滿九十里

譯

矢在絃上不得不發斟酌飽滿勿失毫髮先民有言名
循實核臨事亦然預戒浮滑願告斯邦書丹石碣

塞爾烏蘇

第三十二台
言好水六十里

譯

好是鄉中水行行此異鄉風烟俱浩瀚民物近洪荒旅
館瓊幃白官衙土壁黃

謂驛道
衙門

烹茶應得趣北斗挹天

漿

與驛道圖純齋茶話

此君殊古樸言語不支離切問京華事別深感慨思難

同五色鳳菜比九光芝更話生生理軒然爲解頤據云無子

又恐生子以收洗者異也意似俟任滿而爲者聞之大笑

有感

漢祖醢韓彭酬功恩大薄今遇齷齪奴放膽大脫略倘使據形勝三齊王可作未嘗有大梁已若邀封爵此等獷悍輩居心敢行惡緬懷高祖事所爲竟不錯

主人守廉謹尙敢恣心胸若稍非分爲何以撓其鋒張詠有契友悍奴曲包容終試益州劍俊爽如決癰此風亦已古生晚莫由從翦燭默無語笑看青芙蓉

墨端卽事

塞爾烏蘇坐馬忽失銜勒怒欲嚴究至墨端而該章蓋呈出可恨可歎

九月

初一日第三十三台

譯言木頭七十里

五月披裘客

塞外冬夏皆裘

何能拾路金誰知愛銜勒竟至費

搜尋雅有還珠幸彌存執玉心澆風期振刷扼腕幾沈

吟

哈必爾噶

第三十四台百二十里是日作瀚海賦

譯言脇條一

古人駢脇稱大勇地靈人傑真將種豈知烏江敗重瞳
手難縛雞成大功吁嗟乎手難縛雞者誰子樽俎折衝
竟萬里沙陀莫問韓侯蹤於今可有李橫衝

詩保泰早尖作

初二日第三十五台譯言飛鳥六十五里

想是和林地祥鍾鐵木眞誰爲褚登善飛鳥解依人

保泰持盈意端宜入雅詩君臣貴同德仰止有餘思

宿柵薩作

第三十六台

譯言驛九十五里作風吹草低見牛羊賦

俊馬如龍越峻坡聲靈全賴

主恩多笑他北宋姚平仲蜀道倉皇走白驃

早赴吉噶木

初三日第三十七台
譯言肚帶根八十五里

未曉策征鞍何虞行路難近天星斗大浮地雪霜寒鬢
冷新添白心孤永勵丹遙知京國侶待漏肅

朝端

孟格圖因馬僕闕誅之以詩

第三十八台
六十五里

無端芥蒂起戈矛道路栖栖敢眾咻未必眼前知牝牡

何能皮裏寓陽秋自矜色相同遼豕

各自居功非止二人

不耐衣

冠笑楚猴此輩悍奴宜盡殺那須刑律費詳求

宿察布齊爾

第三十九台一百里

一路車馳驟天涯又海涯

數日皆瀚海地

人緣宵起倦山共夕

陽斜得句時因夢安身卽是家明晨仍歷碌貫月笑浮槎

哈沙圖譯言院也必有稱其爲院者因用玉茗堂

賞心樂事誰家院句爲韻作哈沙圖歌

初四日第四十

台九十里

哈沙圖地勢蒼莽因院得名費遐想拓拔代遠契丹湮

完顏豈能此游賞元家天子興和林

元太祖起於和林在杭靄山南數百

里

境王侯甲第羅深沉鳳樓雲暖親藩夢燕寢風香貴主

心穹廬倚天奇制作爭及亭臺恣行樂兩行紅玉豐貂
裘幾曲粉垣新虎落桃花叱撥繡旗幟縱獵歸來稱快
事胡撥四鳴邊月高長十八璨山雲翠天魔舞後皇綱
虧往蹟荒涼更問誰無人爲作南園記有石都成沒字
碑茫茫雁磧開風砂愛曼何處伯顏家我思著述徵文
獻停驂顧望徒咨嗟咨嗟興廢多遷變漢寢唐陵皆露
電野狐人立鶴鷗號古今多少笙歌院

到哲林作

第四十一台
一百三十里

何日到杭霽年華告肅霜那堪臨朔漠況復近重陽酒
自天山碧花應

帝里黃家書寫安善鴻雁喜南翔

遇科布多領例差官
諾敏寄梅谷二兄及

友梅三弟玉
堂五弟家信

翁金

初五日第四十二台即
翁金大河二百三十里

捲地西風吹白雲沙雞飛竄馬羊羣翁金灘上驅車過
銷得輪躡鐵幾分

縈紅繚白鬱長途賀勒蘇兼德勒蘇借問山靈誰管領
不知斬伐太糊塗

烏訥克特

第四十三台
譯言狐一百里

古有飛狐塞傳言在此間曾無熊館路漸接馬鞍山即杭
山野曠日常豁身勞心自閒生平多戇直阿紫莫開顏

赴哈達圖

初六日第四十四台 譯言石頭一百
二十里喀爾沁地止此察哈爾所管台

站亦
止此

昨日翁金莽叢薄野雞亂飛狐兔樂今行烏訥克特西
雲物沉沉轉邱壑芟苦草白紛葳蕤忽看曠朗忽厓屨
俯仰曲折總意愜車聲霹靂颺輪馳嘗以山河稽塞外
杭靄遙接阿爾泰色楞格河克魯倫推台有水相縈帶
表表均自傳名稱況此遠勢盤峻嶒脈衍馬鞍體宏博
落落漠漠蒼烟凝惜無志書相萃彙土人諒必知稱謂

笑呼章蓋一問之哈達

山訥勒名默特貴也
蒙古語

哈達圖古謠

介于石乃利貞察哈爾境卜其盈載瞻杭靄蒼庚庚君
子至止道大亨

路人杭靄作

古燕然
山支麓

燕然銘績想森嚴往迹苔荒石磴粘人近九天詩膽壯
雪明諸嶂酒懷添崇高望遠神彌靜險阻經多意轉恬
我本玉皇香案吏端宜韡踏五雲尖

哈拉尼敦

第四十五台
譯言黑眼一百
里烏里雅蘇台所轄台站始此

聞說匈奴眼睛綠李陵子孫黑其目瀚海東西滋游牧

至今猶應傳部族吁嗟猿臂飛將軍中華以外延祔雲
燒荒夜獵射猛虎可有英風肖乃祖

赴噶魯砥

一峰未平一峰起譯者驚言噶魯砥童僕惶悚我怡然
路在必行詎中止凌晨命駕踏雲來所謂艱難僅如此
言念諸葛忠武侯隨處特宜謹慎耳

他楚途中

第四十七
台一百里

他楚路漫漫罡風刺骨寒穿雲爭鶴步疊石認龍蟠但
覺乾坤肅眞當泰華看好尋神禹迹山木久隨刊

烏爾圖額勒胡篤克

初八日第四十八台
譯言長井百五十里

無待銀床護光生修綆寒共欣沾厚澤終不起狂瀾地
許同河潤人方作鏡看雅宜長且久高住好峰巒

由沙拉噶勒卓特赴推台

第四十九台六十里第
五十台一百五十里

駐馬匆匆茗一杯嶺雲隨我到推台祇因癖性同顛米
好向河干覓硯材

推河石
可硯

前驅報說綠盈坡浩浩平沙渺渺波馬蘭秋紅魚藻碧
半山斜日過推河

由推英郭勒祭所旋推台作

初九日該王
愛曼五十里

杭靄山頭作重九自古登高未曾有陶令襟期黨進豪
菊花詩對羔羊酒急鋒車驟班馬鳴山隈水渌低昂行

祇緣

聖澤如天大遂使雄藩伏地迎禮成返轡踏明月更擬
飛觴清興發猛思京國正持螯滿案橙香紅玉滑仲兄
昔年旌節過梅谷二兄曾爲定邊參贊大臣爲我歷歷說山河佳節曾
否念弱弟應醉茱萸金叵羅

得扎將軍南山書

異域三秋節將軍一紙書殷勤思遠道古誼照穹廬感
慨默無語低徊意有餘答牋殊草草臨發尙躊躇

由推台旋軫喜而有作

初十日

塞雁響西風迴車路指東宿雲山角紫初日馬頭紅藩

部欣宣慰天心幸感通

連日

京華知尙遠樂意已融融

奉使三音諾彥記程草卷一終

塞上吟卷二

五十
一首

賦二篇
附錄

吉林寶盞佩蘅

竹枝詞三十韻

竹枝以唐劉隨州爲最紀風土述人情妙絕一時余偶來塞外見聞無幾因赴噶魯砥山峻路遠車中口占二十四首次日續得六首或莊言之或諧言之以示采風問俗之意而究未審其當焉否也佩蘅自識

擅廬得火煖烘烘力可回天第一功
鳳炭麝煤全擱起
馬通牛矢一齊紅

黃衣冠著奉金容達賚班禪大法宗成佛生天誰管得
祇將肉食學庸庸

笑我馳驅興未降閒將牛乳試雞缸從知調燮仍無補
贏得星星白鬢雙

出塞以來日食
酪漿鬢乃添白

語言文字總無知雅善摸稜我欲師豈是汾陽傳別派
看來純是學聾癡

臺上人間通漢語家丁
等每相呼應佯爲不解

丁香叱撥逐風飛淺草平原雪打圍文豹元熊均未見
爭誇狡兔得霜肥

冰天雪地食無魚烹得肥羊味有餘羶行人人追大舜

須知木石本同居

衣多油膩
習尙如此

八百牟尼一串珠口中禪誦半模糊偶逢琳剎齊摩頂

云勝伊蘇

九數也

默勒孤

叩頭也以首摩門窗據去禮節大於九叩

驀坡注澗任霜蹠直使蒼鷹望眼迷生鐵鑄成渾一樣

不知人世有高低

人與馬如生成者然

巨鑊油油味孔佳炒成卜達

米也著酥乳

釵生平不解何

曾飽漫比堯羹進土階

炒米奶茶比戶皆然

傳聞曠野有遺骸妙義南華誰解來螻蟻烏鳶無判別

許多莊子在龍堆

與南荒鳥葬相等

五月披裘詡負薪爭如斯地古風醇子陵若解居沙漠

光武何從識故人

冬夏衣裘隨在皆是

牛羊駝馬一羣羣幾許名王部落分可惜貪風難振刷
誰知富貴等浮雲

棍卜丹津姓字存沓來紛至護行轅朔風天馬歌如昨

不見當年綽克渾

綽克渾超勇親王部將善偵探功最多能爲朔風天馬之歌

牝牡驪黃一例看虛生駿骨老烏桓我來也自成皮相

問馬惟求諾穆歡

諾穆歡譯言馴良清語亦蒙古語

鄂博高堆大小山神靈陟降有無閒盛稱六月眞嘉會

萬仞峯頭福胙頒

六月六日致祭鄂博牛羊等祭品甚盛

乘輶恰值暮秋天衰草離離拂野烟左右不知興廢事

教人何處問祁連

西風作冷馬蕭蕭不慮征途太寂寥章蓋偶然能漢語

侈談額勒德尼昭

昭譯爲廟在定邊界內云規模亦宏敞

山後山前蒙古包行人儘日走山坳喜聞到處皆堪住
不數多年杵臼交

北地雄風振古豪小兒衣上亦容刀虎頭燕領封侯相
食肉原來盡老饕

胭脂山下美人多狐帽披風珠練拖怪底容光殊繞國
不施鉛粉抹烟螺

豐貂壓鬢髻盤鴉撲鼻酥香解喚茶聽得小名尤旖旎
雲端霖沁更丹巴

白白紅紅眾草芳金桃柯幹淺深黃低叢扎噶渾無用

那有奇材可棟梁

杭霽以南除二株神樹外絕無大木

雷劍鋒銛紫氣橫曾誅木魅走山精如何賈作時相混

蕩穢除邪浪得名

雷劍形模不一亦有賈作

奔巴圖界產空青滌目功深藥有靈底事無人多採取

想因妍醜怕分形

杭香茶熟氣蒸蒸珍重天山一片冰不爲風霜磨礪久

愛渠猶有玉壺稱

他楚推臺均銘冰而飲食之

黍谷回春比例求願將朔漠變中州蘑菇更望穹廬大

稻長清腸歲有秋

漢宮窮袴到如今生死難回嫉妬心羨煞龍城人曠達

祇愁風颺綉羅襟

聞多不著袴者

漠北蒼茫接漠南元家王氣此淵涵未詳起輦墳何在

野草衰黃天蔚藍

元太祖墳於起輦谷

一聲嘯起野風尖馬足何人敢或淹簇擁星輶如箭疾

此中號令尙森嚴

每蹙口作哨馬卽飛走

塞上風雲氣不凡偶資諧笑輔占咸異時更有沃臣使

好贈新詩伴枕函

秋興八首用杜拾遺韻

眼前碌碌誰爲海外之文章筆下洋洋偶仿蜀

中之音節彼居夔府無限牢愁我到和林幾多
感慨涉少陵之地齒冷何妨等勅勒之歌胸懷
自適九月十三日戲書於喀拉沁部之哲林幄
次

山繞推河翠滿林百千松樹鬱森森

到推英郭勒始見松樹成林綏

藩行幄雲成綵返轡涼宵月有陰

祭畢回臺東山月上境極天高

橫朔氣秋如人淡淨詩心成羣暮馬聽吟嘯不比鄉關
急杵砧

登登山徑石橫斜一路霜華冷月華亭憶瀛洲揮綵筆
車行瀚海等浮槎五更曉漏羌人笛四野邊聲蔡文笳

多少情懷誰與證衝寒應負

上林花

立馬天山最上頭荒烟萬里況三秋目空陳亮無千古
心鄙張衡有四愁夢寐

神京疑化蝶浮沉宦海欲盟鷗同人亦說皇華使李邵

占星獨益州

同時有赴青海者
皆中原坦路也

朝暉朗照更斜暉力障西風酒力微貢使偶逢天馬至
遇定邊貢

土人豔說野狐飛

經烏訥克特
地名譯言狐

冰霜自昔時

爲厲弧矢於今願不違賴有

聖恩添食料羔羊逐日割鮮肥

事同樵者偶觀碁底用胸中著喜悲隨處可爲桑影社
明年仍有菊花時天風浩浩欣相送王道平平賦載馳
豈是瞿曇能解脫早從周易證無思

元家甌脫舊河山指點黃雲白草間至正晚年仍大漠
居庸當日自雄關文名一代尊都刺武烈千秋震伯顏
聖世卽今多戚里虎賁環衛幾崇班

策凌血戰有奇功旌旆飛揚想像中杭靄山深空積雪
陀黎泉冷又嚴風椎牛大野炊烟白射虎高原獵火紅
得失偶然何處問瓊廬笑指塞邊翁

平沙蒼莽路逶迤雪滿峯巒冰滿陂漠北夢寒金粟影

塞外多奉雅穆燕南心暖玉梅枝遙思大捷昇平奏許久
達囑余屢見之未見即抄盼望八月十五日出大境
捷音何勝翹企門後寒暖已過殊矣屢覺殊方氣候移
灑墨淋漓追杜老試看海立接雲垂

哲林歸程示車前烏拉契

霜花滿地曉光催攜得清風兩袖回問事每思良馬對
聞歌應唱野鷹來有時唱答不知何曲有人驅駕紆鞭策章蓋等時促迫
之助我聲威肅電雷袞袞諸公在前列莫將奔走詡長

才

賦得蘇子卿在匈奴取婦生子

子名通國

嘉耦話當年生兒竟象賢羊裘寒況味貂錦小嬋娟夜

月鴛鴦牒春風殺癩天同甘低毳幕回暖想冰瓊鴻雁
三秋早熊羆一夢圓忠貞原照灼情致自纏綿豈遂聲
光累能教似續延緬懷通國事憑弔幾流連

其二

花老蠓螭塞風香蛺蝶雌喜將飛鳳卜爭說牧羊時埽
雪眠雲地懷珠韞玉思冰霜高雁磧酥酪健麟兒柳下
殊貞抱瓜綿續本支年華燕姑共心緒李陵知旄節干
秋豔刀環兩念癡臙脂山下過芳草自離離

連日牽疇拉馬者和肯也詩以誌之

蒙古呼女
曰扣肯

名馬桃花色桃花又幾枝星占房駟朗風引庶人雌險

遠誠難計嬌憨總不知
遶行添雅興間誦木蘭辭

緒齋得生子家報賀以七絕二章

子名虎兒

驛使傳呼喜氣新
君家天送石麒麟
嘉名卻取風從虎
遠勝當年米友仁

好水川前笑口開

時行抵賽爾烏蘇

端宜置酒醉金罍
明年更

爲徵蘭頌湯餅還期補喫來

贈攝通事章蓋扎拉芬

黑比崑崙驚比鷹
居然應對有專能
形骸原不關靈蠢
嫵媚曾聞說魏微

曉霜甚濃日出稍適感而有作

不知霜華飛鐵驪忽已白我行雲壑閒畏寒如屈蠖旭
日來恩暉煖紅滿車箔青女倏無踪凜烈渙然釋幻態
笑炎涼高天自澄碧

擬祭鄂博文

石堆鄂博朔漠攸尊我將致虔永矢弗諼作文
式之潤色塞垣其辭曰

繫石丈之有靈今實降鑒於山川懿五嶽視三公兮雄
氣象於峯巔肇出雲而降雨兮羌烜赫而持權伊上帝
所倚畀兮必聰聽而無偏何水旱或不時兮豈斯民之
罪愆本太蒙之境域兮羣寢饋於裘瓊胡啟牖之不早

今任貪縱而弗悛既養姦以姑息今復降罰而承天徒
崇高以自處今何尊位之能賢願長顧而卻慮今籌操
縱於萬全呼鄒衍以吹律今化沙漠而腴田茹含香而
襲大兮黍被隴而珠圓佑牧馬之蕃息今燦五色而相
宣助牛羊之量谷今胥博碩而肥鮮鍾材武於比戶今
飲讓水與廉泉維季夏之六日今告牲醴而潔虔靈之
來今風肅然赤豹後兮文狸前享馨香而醉飽今動肸
蠁於賓筵靈之去兮空蒼烟野蕩蕩兮雲緜緜閃山花
之撲簌兮極水草而芊眠昔李衛公之祀太華兮疑怒
氣之胸填余小子既和且平兮望服膺而拳拳

小游仙

霓裳閒詠大羅天
遊戲紅塵亦偶然
祇恨蔡經心玩忽
方平三百賜神鞭

鏡泉銘

卽陀黎布拉克

泉妙於潤鏡取其明
澤物鑒物大生廣
生淵乎莫測湛然
以清因時因地濯
足濯纓元冥使者
壽光先生願勒貞
石永此令名

卽景

不須秔稻與桑麻
肉作羹麋乳作茶
霜雪迎秋常在地
馬牛傍晚自歸家
乾坤縱我撐詩筆
山水何人入畫叉

欲弔明妃無處所野雲如夢醉琵琶

得石子花種紀事

石頗瑩潤紅果爾卓拉花如薊而大倍之葉似牛蒡白而多刺

昆都某云五六月作花極紅香

秀色奔巴石

奔巴圖得文石十餘枚

香名察罕花

察罕胡篤克迤東擷得紅果爾

卓拉花種十二穗

兩般光篋笥一路寫清華玉氣連珠氣蘭芽

亦蕙芽斯行良不負芳潤照星槎

瀚海賦

以烟銷大漠虛爲韻

咸豐四年

銓銜

天子命出使喀爾喀三音諾彥部八月癸亥行抵喀爾
沁穆哈里喀順境譯者曰此瀚海界也爾乃岡陵
渺縣沙黃際天乍起乍伏將斷將連聞走輪而響
石思飲馬而無泉訝出沒於前旌紅低斜日合空
濛於大野碧冷荒烟遠路迢迢川原寂寥至牧羊
處節著名標云有蘇武傳自漢朝稱霍尼契

譯言牧羊

或金元遼地寬平而墳衍

有土墳起如列塚可千百計

剎俶詭

而峒嶢

有剎二塔五六皆番僧所經理

凡百五十里而戾止亦可

謂遠邽遙矣李陵居之固應腕扼江淹聞此當
亦魂銷嗟乎若蘇子卿者洵所謂豪傑之最也十
九年中八千里外羶嚼冰霜心堅松檜非管敢所
得同豈單于所能害勲戚如衛霍可云幸竊躬桓
閼闕若金張亦止濫叨冠蓋鴻雁書神麒麟閣繪
迄今千餘載而地以人傳於以見景慕之深於以
見聲光之大羌一望今無涯誰九原今可作馳驟
鋒車居停毳幕忽大風之怒號恍洪濤之繹絡況
玉雪之紛飛又銀潮之騰躍儻疑海藻時見夫扎
噶諸叢

若扎噶若布達拉噶那皆木類拂地而生
若德勒蘇色白若賀勒蘇色紅皆草類多

成叢薄時斷時續互相縈帶

何處海鷗徒憶夫伽陵等雀

內大臣馬

思哈行軍瀚海紀程頗詳據云鳥有吉溜抓藍如伽陵之鳥具百鳥音又有百靈一種今則百靈有之餘未

之見迨畢勒格庫以及塞爾烏蘇諸台無非砂礫縱橫山原盤錯橫絕北溟是名大漠欽惟我

聖祖仁皇帝平三汗之難奠四部之居萬年帶礪一統車書

列聖屢加以恩澤

皇上復廣其儲胥

不忍外藩捐輸以示體卹見駁莊親王封奏之旨

聯各盟

而情達而愛曼而歡臚

小臣

載持旄節如在里閭

晝馳騶從夜穩穹廬雖來異域益感

德輿慚武庫之無聞時美勲名於費揚古

平準藹爾時費揚古爲大

將軍幸詞林之忝附敢忘著述於木元虛哉

風吹草低見牛羊賦

以題爲韻

紫塞秋曉蒼烟野空谷量莫極目斷無窮乍高低
而不定忽隱見而難同蕃牧蓄於陰山四圍茂草
妙吹噓於廣漠幾許清風昔斛律金之在敕勒川
也恃牛羊爲儲備逐水草而恬嬉以生以聚載驅
載馳自安沙磧不設藩籬據草莽而雄豪穹廬大
饗嘯風雲而拉雜畫角橫吹爾乃厯厯平原縣縣
遠道谷口青連褭腰翠掃幾叢亂石平堆無限夕
陽自好擬扣角而無從思捋髯而奚討但見模糊
障錦駝渡黑河時見漉漉飛雲鵬盤白草無何爽

逼山谿驚沙欲迷冷然善也薰且時兮醒牧人於
旗旄任天籟而東西吹殘滿地嫣紅塞花影瘦吹
亞一川遠碧胡燕聲低力極扶搖光分蔥蒨牧犢
間情乳牴真面認訛寢於四週聯池阿而一片豈
是黃昏飯罷寧戚歌來忽如白石叱成初平術見
槲葉颼颼笛聲自秋關山北向隴水西流十里五
里千頭萬頭天蒼蒼兮野茫茫喜維風之偃草耳
濕濕兮角戢戢羌自羊而徂牛維金也家習朔漠
功佐晉陽掃烽烟而後勁生明月而前光猶復率
其質樸發爲詞章可能香草美人有聲通駿直比

大風猛士得意相羊我

國家寸草

恩培

仁風德樹廣開孳息之源宏啟蕩平之路便信使兮往

來慰遠人兮景附

小臣

仰承

異命幸持虎節以綏藩博覽坤輿更畫龍沙而作賦

塞上吟

卷二

圭

塞上吟卷二終

吟梅閣試帖者 佩蘅前輩通籍後所自課也詩筆奇
矯如天馬行空不可羈勒而精思異采湧現毫端至其
神韻淵然尤得穀人祭酒法乳視庸庸館閣體幾管霄
壤或謂佩蘅以世胃掇巍科躋臚仕胡文字精邃至此
此其故他人誠不及知而余固不能以不知謝也憶道
光癸未夏與佩蘅同補博士弟子員時佩蘅年十七余
才十三齡耳余以辛卯歲舉於鄉佩蘅尙困諸生然同
人中耳其名者恆嘖嘖不去口迨丁酉佩蘅始以拔萃
科領鄉薦次年成進士都人士無不以詞林許之佩蘅
亦銳自磨厲試輒入高等願僅以曹郎觀政儀部識與

不識爭爲之扼腕越三載余亦捷南宮忝上第筮仕水曹與佩蘅略相似於是朋好閒言及數奇者率以吾二人相提而論顧余實不及佩蘅遠甚佩蘅旣入春曹郎署清暇名流多迴翔其間佩蘅輒與之旗鼓相當所學日益進余亦時相過從以詩古文詞相切劘而冬官事猥瑣日與匠隸輩析秋毫利學殖遂荒落其去佩蘅曾不可道里計矣旣而佩蘅改官中允薦陟清要學愈力業愈專著作愈富又數年余始得以庶子稱後輩蹤跡日以密友朋杯酌間率以談藝爲樂而佩蘅直諒多聞喜引掖後進每請益必諄諄致誨所以勗予者甚至比

余遷學士佩衡已官閣學尙邀余造其廬共拈題作詩
賦各一孜孜無倦色蓋其浸淫於古者旣專且久故結
習所在造次不能忘當奉使漠北時白草黃沙中日驅
二三百里行則戎車止則毳幕而天山瀚海到處皆詩
境嗣由少宗伯貳司農際

國家多故軍儲圖法運籌無暇晷及典試之江往還百
餘日得詩盈鉅帙非其好學深而致力篤烏能至是況
是編爲中年得意作其迥出流俗而繼聲先賢曷足恠
哉已未夏佩衡手是編屬余序之且曰非以爲名聊以
志吾二人之誼也余感其意故不辭固陋而覲縷言之

若此昔益都相國乞歸寓城南僧院高念東侍郎訪之
談讌竟日贈詩有風味依然兩秀才句余生平愛之慕
之今余才名遠不逮念東而佩衡方膺

主眷領劇職其勲業所就必有勝於益都者異時

朝野清娛吾二人各賦遂初得修兩先生故事則東郭
畫船西山蕭寺攜樽覓句話童稚時景況其情緒當有
深於今日者請以此序爲之兆云

咸豐九年四月十有一日侍生輝發麒慶謹序

吟梅閣試帖詩存卷一

吉林寶鑒

項莊舞劍

得莊字

一劍當筵起鴻門舞項莊楚氛驚隱現漢業卜興
亡白閣虹三尺紅酣酒數觴戎心開亞父怒目小
眞王吉協金刀識寒分玉玦光風雲齊慘淡樽俎
亦鋒鏑主客椎牛地君臣逐鹿場策勲誰獨懋伯
也百夫防

殘菊

得香字

讀罷淵明傳西風一枕涼古懽芸葉靜殘夢菊花

香傲骨矜磨鍊秋心費較量數枝榮晚節三徑淡
斜陽檻外烟仍碧籬根月又黃年華驚瘦蝶消息
問寒蠶畫意疎原好詩懷冷欲狂晶簾人比似笑
爲餞瑤觴

貪看梅花過野橋

得橋字

野梅何處問見說過溪橋貪看花千樹行經路幾
條斷魂噴蝶夢健步趁虹腰曲岸雲雙屐香風酒
一瓢冰心今我契鐵腳舊名標豈待僧相約端宜
鶴共邀尋來殊捷徑修到悟崇朝識石衝寒客終
將鼎鼐調

待雪

得吟字

接天鴉陣黑寒意逗陰陰地屆堅冰候人懷待雪
心凍雲平大野冷日黯遙岑火擬黃羊炙醅還綠
蟻斟梅花同醞釀竹影逼蕭森咏絮儲才久烹茶
寄想深新交聯白屋舊社話烏金佇踏瑤臺月披
裘自在吟

玉殿吹笙第一仙

得仙字

第一通明品無雙妙勝緣玉笙吹玉殿金闕仰金
仙翼古斜排鳳冠尊巧綴蟬指揮香案吏提唱大
羅天箎許蒼龍和班偕白鷺聯飛瓊時拍手子晉

或齊肩月地雲階上霓裳絳節前蓬萊峰絕頂游
戲幾經年

羅浮仙蝶

得仙字

喚醒梅花夢蘧蘧不計年羅浮奇峽蝶金粉豔神
仙紫陌紅塵外斜風細雨天銖衣矜變化錦翅耀
翩翩幻異麻姑米芳尋太乙蓮赤松閒洞壑綠草
古雲烟香國身修到春城路渺綿葛洪何處問軼
事話怡然

耐寒石硯欲生冰

得寒字

欲識堅冰候先從斐几觀銅瓶殊耐冷石硯乍生

寒暖日明虛牖西風峭畫欄碧將鸚眼合黑是麝
煤攢磨礪誇經久觚棱訝肇端頭銜離俗易手筆
濟時難茶火冬心共梅花曉夢殘玉壺誰証取竹
屋樂盤桓

籌筆驛

得籌字

日月尊先帝河山壯益州老臣頻握筆古驛此持
籌綿竹軍書萃空桑相業侔褒斜千甲帳天地一
庚郵主眷思魚水神機策馬牛芻胥雲棧路花夢
錦城秋妙比畱侯著名高德裕樓祠堂餘瘦栢俯
仰話炎劉

其二

魚腹蠶叢地黃沙白草秋大軍疇昔駐荒驛至今
畱吳魏真堪掃蕭曹未足侔中原奔石馬全蜀扼
金牛鳥翼蛇蟠妙綸巾羽扇愁如椽支末造峙鼎
畫奇謀國勢三刀控星芒五丈流怪他陳壽筆將
略未詳籌

其三

大筆淋漓染奇才漢武侯出師箴後主置驛運先
籌慷慨南陽志精詳北伐謀故交參董費孺子托
伊周天險三巴據人功八陣收風烟橫玉壘關隴

望金甌素願桑田証丹心竹帛畱兵書遺匣否荒
礎白雲秋

其四

筆挾風雲氣人高管樂儔聯營眞莫敵設驛預爲
籌肝膽酬昭烈封疆結仲謀銅龍丞相節金馬帝
王州恢復懷中土機宜據上游將才驅向寵天命
恨譙周竹策孫吳法槐花子午秋遺踪偕陣石蒼
莽弔江流

文文山正氣歌

得歌字

一掬文山淚蒼天喚奈何上都元世界正氣宋謳

歌羈客悲三載戢兵恨五坡陰陽空沴戾道義不
銷磨火德紅羊換風謠白雁多日星高炳蔚寒暑
屢蹉跎關月沉燕市宮花夢汴河有人書卻聘壯
節共巍峩

其二

文筆峰前客丹心總不磨乾坤扶正氣身世付悲
歌深院陰房闕忠肝古誼多銷沉燕歲月憑弔宋
山河碧血酬君父黃冠話軸邁網維均有賴生死
誓無他往跡零丁路高名進士科祠堂柴市拜誰
與續陽阿

杜工部秋風嘆

得秋字

錦里花溪界，盲風怪雨秋。
編茅空嘆息，老杜此句留。
白屋乾坤小，黃埃日月愁。
蓬門頻束縛，殞末又飈颺。
弟妹思何限，兒童恨未休。
五陵干廣廈，三峽一孤舟。
消息看歸燕，生涯付野鷗。
賴他嚴僕射，載酒話優游。

其二

工部冰銜在西風，老屋秋浮生天寶。
末永嘆蜀江頭，憶否藍田飲傷哉。
赤甲游山川，驚肅殺，牖戶費綢繆。
命有長鑱倚吹，仍短髮羞鳥飛猿嘯急。
楓葉

菊花愁旅跡羌村溯詩名幕府留青蓮時夢見光
燄滿中州

蘇武吞羶

得吞字

十九年華老匈奴氣欲吞帛書神若助羶雪命猶
存薇蕨胡天苦風霜漢節尊牧羝悲紫塞辟穀駭
烏孫雁磧龍城遠黃雲白日昏任教沙漠徙不羨
酪漿溫報主貞心矢茹毛古誼敦河梁分袂者忠
義莫同論

其二

麒麟高閣上氣象子卿尊旄節今爲烈冰羶昔自

吞天山沙石路瀚海雪霜痕誰復乾餱餽惟餘皓
首存翳桑新境界孤竹古淵源豈意吹毛索還同
果腹論輪臺荒草徧毳幕夕陽昏漢使遺徽遠秋
風說玉門

林逋放鶴

得逋字

鶴共梅花伴孤山興不孤蕭閒高陸羽疎放愜林
逋馴習柴門久飛騰野徑紆掠疑殘雪似望到斷
橋無招引來佳客迴翔慰老夫神仙縈昨夢烟水
得吾徒熟識風雲路誰描笠屐圖五峰三竺外意
趣想清腴

其二

封禪無遺稿看雲識故吾騎驢閒伴侶放鶴靜功
夫歲月霜毛換亭臺薜路紆白翻雙翮健青傍一
山孤梅雪恬情性茶烟入畫圖問名高北宋流影
印西湖花港橋三面雷峰樹幾株水仙祠畔過今
古豔林逋

呂端大事不糊塗

得端字

糊塗矜瑣事才大孰槃槃宰相稱淳化君王識呂
端沉冥齊萬物明敏聽干官守己清孤易隨人拜
跪難先皇憑几命太子捲簾看首列超張趙胸懷

抵范韓乾坤雙眼白日月一心丹異議沽名者曠
堪等量觀

其二

至道咸平際糊塗妙宰官事尊皇子侃勲大呂公
端重遠肩能荷姦回膽欲寒鎖門爭玉步納陛肅
金鑾牙笏威嚴甚心旌震動難剛堅唐宋璟渾厚
漢倪寬文穆光同姓齊賢証古歡魯論誇半部純
駁試偕觀

少陵無海棠詩

得棠字

長安歸不得詩聖更詩狂貧並吟園栗詞惟畧海

棠春陰誰護惜秋興自蒼涼楓葉頻傾耳梅花幾
斷腸憂深丹鳳闕夢冷碧雞坊睡笑楊妃足游喘
蜀郡忙云何疑有諱或偶恨無香千古籐蘿月年
年舊草堂

其二

母也名偏諱無容賦海棠少陵眞孝子天寶舊詩
王巫峽吟懷苦鄜州別夢涼年華飛絮影風味浣
花香別起椿萱例時賡弟妹章巍科同李賀僻字
異劉郎麗色枝翔蝶深情聚記羊拾遺遺可拾務
觀補奚囊

奇文共欣賞

得奇字

東晉千秋恨南村五字詩文章真契合欣賞共瑰
奇著作均懷葛朋儕或采芝田園羣嘯傲山海古
襟期出岫閒雲悟臨軒濁酒知讀依松葉徑笑對
菊花籬栗里高風仰柴桑片月窺先生遺傳在開
卷幾遐思

其二

望益頻開徑臨文復賞奇故人欣與共稚子候偏
宜筆墨騰光怪琴樽照陸離一編黃絹古諸友素
心怡狗吠雞鳴外停雲帶月思葛巾恬北牖花樣

問東籬別有情堪話居然樂不疲桃源源可溯晉
魏笑卑卑

祖逖聞雞起舞

得鞭字

陡起英雄志聞雞舞勃然司州誇主簿祖逖著先
鞭霸業荒陳寶軍聲惡左賢秋心三尺劍曉唱萬
家烟膈膊增繁響昂藏付老拳關河成噩夢風雨
破愁眠越石奇才抗雍邱勇氣堅忠貞今古式擊
楫又江邊

其二

十六國紛然鳴雞得氣先聞聲寒曠野起舞感名

賢金馬餘荒時銅駝冷暮烟司晨愁賈后養距憤
劉淵曉月桑麻徑秋風鼓角天中原多狗盜烈士
此鴻鵠後趙驚雄略元康惜往年新亭王謝輩念
否祖生鞭

以鳥名官

得官字

水火雲龍外奇徵鳥紀官百僚名位仰四海羽儀
看鸞鷟文章麗鴛鴦福祿寬舉朝驚鶴立得路快
鵬搏求友鵠鴻易同羣燕雀難幾人冠謝鵬五色
詒書鸞鳳閣輝常覽麟經典不刊

聖君澄敘切鸞序肅

金鑾

宦途最重是文衡

得衡字

華國文章貴歧途仕宦輕
薦賢誇懋賞報最重持
衡玉汝先奢願金吾豈定評
風雲奇運會山斗舊
才名地有丹梯峙人徒紫綬榮
詩書尊老輩桃李
豔諸生手筆千秋仰頭銜一例清
儒臣邀

聖鑒拔取矢忠誠

其二

公是公非界量才有定衡
幸將文柄握最覺宦途
榮勝地蓬壺近靈臺藻鑑明
花同開富貴草獨秀

科名玉尺羣心愜金門眾目驚宰官需異日奎宿
問前生慧月澄香海春風到管城

聖恩隆養士汲引羨持平

滿城桃李屬春官

得官字

夏屋知名士春曹貢舉官
榷楠連籍屬桃李滿城
看直等梧栖鳳誰云棘止鸞
公門方慕狄幾輩此
瞻韓午運英才盛寅清化育寬
筭厨嘉宴後花雨
曲江干舊制堂稱玉新陰
樹勝珊旁求逢

聖世共矢寸心丹

其二

得城字

春風桃李月桃李滿春城士以材能屬官因選舉
名冬烘消眾謗夏假育羣英有力扶鴻業無言協
駿聲冰壺高品第粉署妙權衡麗日黃金榜祥雲
白玉京從知宗伯貴僉誦主司明好進賢臣頌
彤墀鑒悃誠

星使出詞曹

得星字

詞采輝朱紱曹司近

紫庭人間旄節使天上斗奎星躔次分光氣文章樹典
型象垂占蜀郡麟炳話柯亭揖傍三辰朗神超九
烈靈宮花心抱赤驛柳眼同青此日書銜鳳當年

案照螢戴筐依

帝座遠邇仰晶熒

其二

得曹字

起鳳騰蛟客詞華冠六曹
入偕卿月朗出仰使星
高魁柄尊名位參旗燦節旄
九天新簡命四牡遠
勤勞廬久金坡直躬今玉尺操
漢臣曾昂宿唐代
此韓豪古驛紛行馬雄文想策鰲

恩綸欣寵賁進頌擬王褒

更上一層樓

得樓字

一層層向上峻絕此重樓階級如相引
高寒更莫

伴三辰俱拱揖百尺久添修妙境蟬聯轉遙空鶴
步留風烟澄四面天地廓雙眸碧瓦朱甍外黃河
白日秋鳳凰盤遠勢鸛雀足清游何似依

金闕登臨邁十洲

其二 得層字

未逞樓頭步誰知上一層試將崇級轉更有曲欄
憑門角鉤心勢捫參厯斗能名真宜鳳榜趨不學
猿升邀月豪情助凌雲捷足矜規模超庾亮嘯傲
詔孫登地肖穿珠蟻人疑激水鵬觀成欽

聖治風化日蒸蒸

驊騮開道路 得開字

複水重山外奔雲激電才驊騮千里赴道路一時
開冀野空羣過房星應運來遙天低雁磧特地顯
龍媒霜雪風沙閱驪黃牝牡猜問途驚遠大回首
謝駑駘自古稱其德方今逞爾材

聖君廬駕馭無慮唱虺隤

其二 得驊字

道路艱難掃開先骨力適半空飛閃電一騎走驊
騮所向驚神駿何曾憚阻修雲程高顧盼風勢健
颼颼造父馳驅伴孫陽賞識秋範金誰寫照歎玉

偶昂頭鞭策安閒步關河汗漫遊良材西極貢

聖代遠人柔

鷹隼出風塵

得塵字

傑出看鷹隼摩空絕等倫驚心來月髓刷羽破風
塵白草黃雲路金眸玉爪身騰驤雄意態搏擊俊
精神橫厲原無偶傳呼大有人加威妖鳥輩得志
肅霜晨遠到材常奮高瞻意若瞋廓清欽

聖武驅使見經綸

其二

得風字

鷹隼乘秋出塵寰顧盼雄竦身凌朔雪比類勝晨

風草木威稜肅乾坤眼界空洵洵沙捲白滾滾日
驅紅角立森然異拳張迥不同烟雲揮霍外狐兔
悚惶中吟詠懷工部聲華想太公繡衣扶

聖治駿烈羨崇隆

自古英雄盡解詩

得詩字

不盡蒼茫意英雄自古推壯懷豐沛酒妙解大風
詩河岳承秦業蘭蓀笑楚詞早教諸將服未許腐
儒欺有韵聲靈赫無前氣概奇文章開樸茂興會
寫淋漓雨漢基初創三唐奧已窺

皇心厯典學

聖治邁軒羲

其二 得雄字

詩聖詩仙外高吟
朔大風斬蛇新事業
逐鹿古英雄
蒼莽天才放謳歌
眾志通壯心
徵四始隆準壓
羣公目已無
秦帝魂仍樂
沛宮霸圖歸
雅頌王氣
雜兵戎
猛士懷思切
眞人格調工

奎章欽藻麗
啟牖豁顓蒙

梅花不欠去年詩 得年字

花癖兼詩癖
探梅話去年
信教通驛使
債不欠吟
編東閣雲三徑
西湖月一船
春生除夕酒
香溢衍

波箋叉手條風裏縈心臘雪前祭曾追島佛才肯
讓逋仙守鶴無餘恨騎驢有夙緣調羹逢

聖代宋璟擬齊肩

其二

得花字

不將詩債欠況是賦梅花去歲餘狂態新年感物
華古苔三百樹爆竹萬千家猶憶慕香影真堪豔
齒牙春風供嘯咏臘鼓任喧嘩興豈催租敗心兼
踏雪奢桃符今照爍籐帟昔紛拏

昭代謳歌盛何郎未足誇

其三

得詩字

豈有騷壇客梅花轉欠詩去年真不負佳句總堪
思破臘珠重萼吟香筆一枝錦囊憑我貯銅笛聽
人吹古調兼今律山顛更水湄風光么鳳換心事
蹇驢知月落參橫後茶清酒熟時羅浮春望遠翹
首少陵祠

其四

得梅字

不欠花神債前身本是梅去年堪想像詩客幾追
陪寒憶先時峭春從昨夜來東皇無缺陷香國久
低徊芸豔添新稿椒馨酌舊醅撚髭明月下屈指
凍雲隈爲慙吟哦興非誇敏捷才履端端可慰芳

信棟風催

春風吹又生

得春字

天涯芳草綠又換一年春地暖生機活風吹淑氣
勻燒痕猶在野花信已兼旬豈待如酥雨方鋪似
翠茵西堂尋舊夢南浦話前塵品物句萌候韶華
淡宕辰半林飛絮影十里踏青人沐

澤瀛洲近重占

巽命申

其二

得生字

風信傳春信吹噓最有情水心全解凍草脚又滋

榮雪地融龜坼烟林碎鳥聲去年如此碧今日更
宜晴斜影游絲軟新痕野燒平花村香蹴踏黍谷
律分明到處微和送何人遠道行揚仁逢

聖世鼓舞育羣生

禪心對虎閒

得心字

靜對忘虢虎安閒雅足欽荒涼蕭寺境禪定老僧
心淨果諸天証空山一徑深西風狂別澗慧月朗
平林座有毫瑩玉鈴看項繫金毒龍俱受制意象
了難尋白鴿青猿侶孤雲片石陰長卿高咏處古
德頌惜惜

其二 得閒字

萬劫心常寂，禪關靜不關。
遇人無色相對，虎亦蕭閒。
猛鷲偕風嘯，空明肖石頑。
慧燈紅古刹，冷月黑遙山。
妙証鳶魚際，疑游鹿豕閒。
中懷金鏡朗，外物錦毛斑。
法雨天花落，慈雲貝樹環。
更思龍咒鉢，流水答潺湲。

白鶴時來訪子孫

得來字

當年雙白鶴飛去，更飛來子。
和時延訪，孫謀共溯洄。
三千閒歲月，一二舊池臺。
識字期無忘，乘軒恐不材。
裳衣仙客潔，欬笑老人猜。
九轉丹成頂，諸孤

玉共胎鵝雛同嚇否鹿女與游纔

御苑超靈囿謳歌徧草萊

其二 得孫字

翩然雲影白老鶴下庭軒時已成今古來應訪子
孫仙家勞問姓羽族久分門豈以凌霄漢而忘庇
本根鷓鴣驚炫采鸚鵡喜能言種類青田貴行踪
紫府尊守梅頻顧復對竹有寒溫玉局才誰繼回
翔傍

禁垣

剔開紅焰救飛蛾

得蛾字

畫燭開紅焰深宮戲素娥照非驚見蜎剔特救飛
蛾影撲蟲疑玉香飄袖捲羅心光凝笑我眉樣細
憐他火候同經歷生機此盪摩任尋芳草去莫惜
落花多微物沾膏馥伊人羨手和螽斯縣揖揖仁
厚協賡歌

其二 得紅字

爲救飛蛾出鸞釵用最工櫺開三殿碧焰剔一燈
紅淡認眉曾掃斜翻影欲烘素波長信月粉澤可
憐蟲著手仁恩普關心熱惱同夢夢誰警夢栩栩
漫居功事笑趨炎輩光添坐照中敲棋何處問花

滿上陽宮

樹頭蜂抱花鬚落

得蜂字

在抱花鬚豔當頭樹影重任天嬉舞蝶忽地落游
蜂煦日朝衙放春風密課供生香飛不斷隨意數
何從錦奪千叢麗金迷兩翅慵沾將紅雨潤望去
翠烟濃染惹苔成毯週遭權列墉

御園韶景足品物亦熙雍

其二

得鬚字

樹蔭科頭坐蜂歸此間途喧宜驚草夢落尙抱花
鬚紅蕊尋來慣黃脾熟也無想緣金翼懶恰喜翠

陰鋪影與烟痕韡香和露氣濡作團同蛺蝶比類
異蒲盧別館春初悄幽林興不孤

宸游欣茂育佳景滿

皇都

水面魚吹柳絮行

得行字

絮風楊柳岸水面認縱橫雀啄繽紛墜魚吹自在
行玉拋三尺潔雪點半篙明隱隱如吞吐洋洋屢
送迎翠宜烟樹繞白與浪花縈荷外尋真樂萍邊
逗化生春深恬睡鴨路曲聽流鶯最喜

龍池近涵濡荷

寵榮

其一得魚字

綠柳紛紛飄絮紅鱗正躍魚
渚邊行活潑水面戲吹
噓雪意濃千樹烟光媚
一渠文章花落後風景燕
來初矢口春無限揚鬐樂
有餘脫開塵際網存否
腹中書萍化生機盪蒲依
遠志舒爲龍歸

太液沐澤更容與

吟梅閣試帖詩存卷二

吉林寶璽佩衡

元夜張宴奪崑崙關

得張字

直搗崑崙險功高狄武襄將軍關已奪元夜宴猶
張炬火花千樹賓筵月一堂更衣時頃刻拔幟氣
飛揚雲撼鰲山黑塵驅雉堞黃奇勲銅面目佳節
玉壺觴事業驚蠻部威名懾鬼章卻憐文相國出
鎮話倉皇

其二 得關字

燈火傳呼急崑崙奏凱還主賓元夜酒邕桂漢時

關有興銀花助無聲鐵甲擐歡騰三五夕平踏萬
重山明月笙歌壯東風鼓角閒版圖恢鳥道俘馘
計花鬢緩帶輕裘意長槍大戟間金龍衣可証功
烈重朝班

校理秘文

得文字

典策羅清秘鸞飄鳳泊文聲華金馬貴校理玉堂
勤牒認玲瓏竹香翻郁烈芸定兼飛鹿紀幸免祖
龍焚俗說刊同異迂儒駭見聞無花雙目炯掃葉
一心殷亥豕多相似丁鴻未足云承明誇著作

奎藻仰星雲

其二得文字

鳳閣宣鴻業孜孜校理勤義軒巢燧秘河嶽日星
文徽省多奇字蘭臺証異聞手牋兼口沫縷析更
條分雪亮窺精奧雷同訂糾紛嫋嫋仙洞壑宛委
古烟雲班固辭畱漢彭錢事監殷

聖朝珍典籍吉士勵宵旰

春陰只欲傍高樓

得樓字

欲問春消息輕陰淡不收幾番憑曲檻只訝傍高
樓烟暖青如畫雲低翠乍流養花天醞釀聽雨客
句畱豈爲層欄峻偏宜淑氣浮二分濃一色百尺

豁雙眸煦嫗機相引
霏微迹可求登臨誰作賦
茂對仰

皇州

其二得春字

只覺高樓傍雲陰
畫未真似迷三里霧欲釀十分
春梯峻丹初渥烟橫翠漸勻
空濛宜長養登眺幾
逡巡微雨攬輕暖
和風蕩遠神影搖楊柳潤香醉
杏花新得地滋培久憑欄指點頻

醲恩敷率土草野頌

皇仁

詩書至道該

得書字

至道通無極遺編味有餘範圍今禮樂該括古詩
書密咏恬吟悟微言奧旨儲毛萇同啟牖張霸笑
拘墟誦讀功宜爾源流理問渠幾人心所宅百世
德之輿象數機相貫麟經義共攄集賢思往哲
拜侍

宸居

其二

得該字

夙有詩書好淵源共溯洄常經原燦著至道此兼
該政自周京啟文從孔壁來三千篇考訂十六字

昭回魚雅深涵泳
夔龍入化裁
言通端木賜
仕証
漆雕開得趣
皆名理
成功卽雋才

聖朝崇正學
多士荷栽培

學然後知不足

得知字

不足宜求足
先知覺後知
果然勤問學
始得判盈
虧
詞海書山接
賢關
聖域期幾年
同蛾術
半解竟
狐疑
肯信胸羅富
翻嫌面壁遲
龍威無剩義
虎觀
有餘思
燈火雞窗久
烟雲蠹簡披

皇心廑念典
吉士益孜孜

其二

得知字

耽道研精後欣然別有知學修原不已充足轉難
期藝圃岡鳴鳳詞源海測蠡久堪今我証仍恨古
人欺鹿角眞能折羊珠或致疑友常三益望讀悔
十年遲筆底花生候胸懷雪亮時幸逢

文治洽兢業勉猷爲

仁者壽

得仁字

日月升恒壽乾坤覆載仁滿腔慈意念竟體健精
神養就無私德蒸成與物春玉堂仙慧性金粟佛
全身不待餐靈藥常教擬大椿萬年誰貢蛤一角
總歌麟和順充懷抱康強異等倫呼嵩逢

聖代

醴化久彌綸

其二 得慈字

華祝昭千禋仁聲徧九達
銘彰恭則壽理協止於
慈五福先歸極三無久絕
私靜真山德肖添紀海
籌宜瑞牒珠囊衍靈符石
鏡知帡幪兼黑齒毛髓
是黃眉金玉持躬後岡陵
合頌時作人欽

盛化寰宇樂雍熙

圓荷浮小葉

得圓字

春老池塘夢人懷蒔菖天
浮看荷葉小疊趁浪花

圓紫影萍踪外蘆芽荻筍前露將擎滴滴歌不唱
田田細碎魚苗漾霏微鴨漲連幾時撐翠蓋萬選
訝青錢柳嶼澄新雨蘋洲淡暮烟

恩波承太液鳬藻頌聯翩

其二 得荷字

萬頃桃花浪浮沉已逝波一池看小葉幾日長圓
荷貼水纔縈拂凌風已盪摩杯筒遲象鼻篙眼障
蜂巢夾岸青遮柳迴汀綠漾莎珠宜清露點葢仁
翠烟拖喧雨聽猶未如規擬若何緬懷君子德靈
沼效賡歌

細麥落輕花

得輕字

南風吹不斷滿耳栗畱聲細麥連畦秀飛花落地
輕四時先得氣雙穗久含英玉屑香無力金芒簇
有情白攬雲影碎翠瀉浪紋平徙倚麻同茂飄蕭
雉莫驚園蔬供紫蕨林果豔朱櫻令節恢台紀康
年

聖化行

其二 得花字

麥隴橫縱處蕭疎景趣賒細攢初夏穎輕落大田
花或或休疑黍幪幪或傍麻翻惟兼綠浪飛不作

紅霞潤帶清晨氣香吹野老家兔絲牽染惹雉雛
寫幽遐芳樹烟千縷前村路幾叉來蕤歌

聖世豐樂滿簞車

夜雨長溪痕

得溪字

綠湛波痕長花溪更竹溪曉風吹灩灩夜雨話淒淒
淒萍泛侵魚扈芹香潤燕泥歸雲猶斷續曲岸忽
高低旅客登樓聽山禽脫袴啼濕烟芳樹外流水
畫橋西昨夢檐聲聒前村渡口迷順時承

帝澤農事課鋤犁

其二

得溪字

空翠南樓引春深入望迷雨曾喧昨夜痕恰長前
溪日暖魚苗漾風斜燕影低綠添芳草岸紅雜落
花泥楊柳烟猶濕蕩蒿渚漸齊沽同丁字認聲憶
子規啼別館雲三徑平原土一犁

御園新澤渥樂事咏鳬鷺

其二 得痕字

雨氣連雲黯溪聲徹夜喧曉澄靄色岸長綠波
痕芳樹呼鳩婦平畦漾稻孫上游彌活潑下尺漫
評論桃浪魚天接萍踪蟹斲存迴汀添碧暈飛電
憶黃昏濕霧迷三里垂楊畫一村

龍津饒壽景涵泳荷

仁恩

其四 得痕字

昨夜溪雲長飄蕭急點繁落花三月雨流水半篙
痕樹密黃鶯濕烟明白鷺翻清光漁艇外舊迹釣
臺根菱汙干塍沒蕉窗幾陣喧汪洋通地脉滋息
荷天恩畫意添摩詰詩懷紀許渾何如靈沼頌被
澤侍

金門

好風飄樹柳陰涼 得陰字

無限風光好飄飄漾柳陰樹看濃翠活人訝嫩涼
侵飛絮三春雪柔絲萬縷金路回烟外曲色較雨
中深似障青油幕誰眠綠綺琴有時聞遠籟何處
著煩襟畫舫橫遙岸冰壺証素心勵清邀

聖鑒建立盛儒林

其二 得陰字

好風飄不斷楊柳翠陰陰樹靜人逾健涼生暑不
侵落紅花影悄濃綠草香深蝶助翩翩勢鶯流宛
轉音樓臺恬午夢水石悟秋心地愛蒼苔掃天忘
赤日臨高槐清結蔭修竹別成林解慍揮瑤軫乘

時契

聖襟

梨園弟子白髮新

得園字

白雪新華髮紅綃昔厚恩
河山收李郭弟子老梨園
天寶宏規溯霓裳妙譜翻
鈴聲愁別調棧路剩驚魂
春雨三郎夢秋霜兩鬢痕
紫雲飄法曲素月下長門
菊部商音苦楊家鬼唱繁
龜年何處問檀板共金樽

其二

得新字

弟子青年悞頭顱白髮新
梨園悲末路楊氏怨前

塵羯鼓盧龍月鶯花野鹿春九重猶幸蜀十一偶
歸秦凝碧沉仙樂延秋認鬼燐繁霜今老大迴雪
昔圓勻鸚鵡林邊訊琵琶夢裏身上皇吹玉笛風
露幾傷神

高下麥苗新雨後

得苗字

細雨廉纖後新晴野趣饒淺深融宿麥高下簇良
苗土脈滋千頃雲容麗九霄紅收塵簌簌綠捲浪
迢迢頓覺連畦長全殊抱甕澆雙歧懷古諺十日
應今朝茂欲勝華黍時方詠秀萸彥之才孰匹

渥澤譜風謠

其二 得苗字

棗花桐葉外高下麥抽苗得味風來早懷新雨後
饒前村融地脈昨夕倒天瓢年預金穰祝膏因玉
燭調桑麻爭秀發原隰接迢遙晨氣連雲潤晴光
隔隴描秋占魚夢近春挾雉媒驕琢句超荀鶴

醞恩頌

聖朝

淺深山色晚晴時

得深字

傍晚青山色時哉趣可尋
乍晴緣乍雨宜淺復宜
深風磴迴層嶂烟巒潤遠林翠畱朝爽活紅寫夕

陽沉白石清泉外蒼藤古柏陰人疑皴有法雲自
去無心合挂徽之笏誰橫伯也琴蓬萊峰第一被

澤頌

君臨

其二得晴字

淺淺深深幻空空色色并遙山千嶂晚時雨一天
晴霞斷峰腰影泉奔石罅聲青蒼渾欲滴紫翠不
知名林木紅樓隱風烟白鳥橫荆關新畫稿笠屐
舊詩情漁唱還樵唱松棚更豆棚

御園澄霽景佳趣近蓬瀛

致遠託驥

得良字

策驥緣知驥何虞道阻長呈材深寄託致遠著調
良風骨羣空冀星精宿應房一心成坦白萬里耀
飛黃德力真龍種馳驅孰雁行雲雷爭奮迅天地
助昂藏志趣高鴻鵠聲名古鸛鵒

聖君厪駕馭貞吉協無疆

其二

得良字

一曲歌天驥材由致遠彰塵埃欣伯樂道路託王
良鳳嶺龍沙輓麟文虎脊長與誰矜意態所向盡
平康伏櫪嗤中駟先鞭許上襄驚人傳緒白知己

略驪黃朔雪蒲梢古春風苜蓿香雲程馳驟穩
恩沛紫絲纒

鍊石補天

得天字

五色媧皇石重霄帝釋天鍊將神布濩補得隙勻
圓星斗羅胸處蛟龍捧橐年四維張若蓋一握想
如拳黑白同修月青蒼盡化烟微痕融斧鑿妙境
仰高堅攝魄長庚擬搜奇列子傳

聖朝無闕略

化澤徧垓垓

其二 得天字

誰補穹窿闕龍官鳳紀前人居無漏地石鍊大羅
天腴想雲根截神從月窟穿陰陽雙熾炭山海一
揮鞭蟻磨搏掄力鴻鈞鼓鑄權青純功早課碧落
字應鑄壯志高精衛飛行抵倭倭倭共臣職懍

帝德仰

乘乾

歌風臺

得臺字

掀天天子氣莽莽大風來創建懷炎漢謳歌認故
臺鄉關尊赤帝旌旆走黃埃鬱勃興龍地昂藏逐
鹿才錦衣亭長貴瓦缶酒徒陪楚業烏騅弔秦聲

白雪推八年工戰伐一曲小徘徊不盡登臨意
荒澁古苔

其二 得臺字

卻月曾聞觀歌風亦有臺真人王業定游子故鄉
回沛國雲三面彭城土一坏壯懷閒擊壤大度笑
銜杯歡洽迎鑾路飛揚命世才俯將秦地小憶否
楚聲哀赤幟爭飄忽黃金共溯洄栢梁延後嗣文
酒又樽罍

洛陽耆英會

雅會香山繼耆英豔酢酬丹心文相業白髮洛陽

秋爵秩頭銜略班聯齒錄搜同庚誰月旦老子足
風流援例容司馬餘情笑祝鳩十三人一德九五
福雙修軼事元豐紀真形妙覺畱

聖朝多大耄宋史讓鴻庥

其二

真率曾嘉會河陽續唱酬耆英高北宋溫洛俯東
流皓白鬚眉古拖朱杖履適樂天懷異代易地話
同儔有序偕鳴雁無心豔叱騶壽因參福慧畫意
托公侯姚魏花應笑伊瀍水不秋至今賢聖院佛
火照清游

倉庚鳴

得鳴字

百五春光麗天教以鳥鳴斜飛來社乙巧語出倉
庚亦解求其友非關訴不平金衣輝絢爛珠串調
分明俗耳詩腸外千門萬戶聲風花紅杏塢烟月
綠楊城遷喜芳辰遇催先淑氣迎

上林枝許借鸞鳳快同賡

其二

江南芳草碧相喚有倉庚擇地原知止逢時亦善
鳴竊藍輪慧性濃綠出新聲簧炙圓初協梭穿巧
莫名絮風楊柳岸花雨牡丹棚搏黍猜同異攜柑

話送迎三春添煦嫗一片寫和平鼓吹宜韶景仙
音接

鳳城

落日照漁家

得村字

唱徹漁家傲山村接水村歸雲澄碧照落日淡黃
昏閃爍魚天做玲瓏蟹簍存暖紅畱竹屋空翠淨
柴門別浦聞呼鴨鄰翁說解黿芙蓉晴露色楊柳
暮烟痕影畫烏篷外波明白石根待看涼月上風
景悟桃源

其二

照眼江湖白漁家老屋存三篙斜落日一水抱孤
村楓葉紅搖影菱花紫著痕短牆簑笠曬前浦鷺
鷗喧碧漢炊烟直黃雲野渡昏人懷湯谷地天關
武陵源列岫排侵牖歸舟唱到門放翁吟興足卽
境倒金樽

太尉足香

得香字

太尉高名位庸奴佞肺腸幾番心貢媚一語足生
香梅証前身慧蘭尊竟體芳脫鞢爭吉莫濯水卽
都梁世味談空慣人情逐臭忙背殊諛蒯徹瘥豈
羨汾陽節鉞榮非倖薰蕕辨已忘彭孫貽口實今

古感蒼茫

其二

濯足鬱金堂非香亦覺香
佞人工倣詭太尉助輝
光衛早葵心警諛徒莠說
彰蘭芬兼桂馥虎步更
龍驤玉趾名猶歉銀鞵
願許償置身能滌垢插腳
總流芳臭味酸鹹外超承
仕宦場書同劉一丈感
慨付瑤觴

嚴子陵釣臺

得裘字

客星山近遠把釣此遨遊
臺影三篙直灘聲萬古
流乾坤餘大澤風雨老孤舟
帝業方銅馬予懷自

海鷗故人容夔屈名士豈魚求梅尉青娥夢桐廬
白水秋史言加腹豔鳥語畫眉幽往哲誰堪匹高
情五月裘

其二

得裘字

峻絕嚴陵瀨荒臺俯急流魚忘真主水羊說老漁
裘舉足千星象冥心付野鷗一竿高兩漢七里谿
雙眸往跡同韓信全身卽許由富春閒歲月華夏
小王侯鄉共南陽溯雲看北固浮祠堂應不遠楓
葉蓼花秋

老子猶龍

得師字

屈護周家史，猶龍孔氏辭。
阿誰天下老，之子聖人師。
比德休歌鳳，探源恰悟驪。
一珠千古揭，三寶數言垂。
摹狀應無耳，詢名欲解頤。
白頭尊矍鑠，紫氣助迷離。
玉府書修竹，瑤田草種芝。

乘乾欽

帝學

化澤邁軒羲

其二 得師字

德純庚子聖，守羨甲辰雌。
嘆鳳年華老，猶龍道範奇。
壽應高日月，品不雜蛟螭。
河上經宜注，關前氣

早知後天天有用問禮禮無遺恢詭喬松外飛騰
化李時神明渾若此狀貌卽之而一笑青牛過驚
傳尹喜師

元鳥至

得風字

王謝堂前燕春愁話最工園林飛絮雪門巷落花
風水掠琉璃滑梁窺玳瑁空參差時下上飄瞥忽
西東故壘芹泥綠遙村杏雨紅頻來曾爾識知止
與人同斜日芳郊外連雲大廈中枌榆新賽社軟
語答鄰翁

其二

得風字

燕燕如期至差池作勢工半村榆莢雨十里杏林
風夢裏雲軒碧年時綵綫紅飛花閒院宇香絮靜
簾櫳佳兆懷燕國新妝說漢宮雙襟春水拂一路
夕陽烘青瑣重門熟烏衣舊巷通翱翔依

上苑戀切

主恩隆

停琴伫涼月

得停字

音寂琴三疊涼遲月一庭抗懷千里伫揮手七絃
停暮色沉晶箔秋心入錦屏鞠通間響答桂魄悟
虛靈篆古濃添麝簾疎巧度螢樹陰流水碧天末

晚烟青卸砌衣霑露銀雲彩射星好看金鏡滿彈
與素娥聽

其二 得停字

目送飛鴻去琴徽手乍停境懷涼月白神仁暮天
青烟靜林邊几風傳屋角鈴影迴紅燭悄曲待紫
雲聽寒碧三更露昏黃數點星五絃虛玉軫四面
冷銀屏庾亮思吟嘯成連契性靈無言應有悟桂
窟采芳馨

天高秋月明 得明字

萬里高秋迴天空月倍明永嘉澄夜色康樂寫詩

情雲淨蟾無翳江寒鶴有聲遙青低四野虛白逼
三更玉宇心期曠冰壺眼界清微烟京口樹涼露
石頭城載呀良宵句常懷大謝名乘風誰想像奇
氣斗牛橫

刑簡枉錯

得刑字

雅詠安仁擅歌傳至治馨錯原期去枉簡早頒無
刑立法調溫肅澄源別渭涇五辭稀判牘諸直喜
盈庭惠溥金雞廣威分繡豸靈落花間歲月惡秀
峻儀型豈必丹書刻真教白筆停

聖朝崇德化綱紀仰

彤廷

風篁成韻

得涼字

萬个幽篁綠吟成
緬謝莊秋高風有韻
夜靜月俱涼
整整斜斜趣梢梢
葉葉旁濃陰時左右
虛籟自宮商
露滴中庭白
烟凝一徑蒼
律疑吹嶰谷
譜欲問霓裳
市地蟾光合
凌雲鳳尾翔

御園

宸賞愜勁節助蕃昌

檢身若不及

得身字

欽若兼時若修身愈檢身
有爲期迅厲不及凜持

循見善前疑卻求疵幻恐眞玉成嚴一已金式警
重申益進雷同奮升高日與新望羊深向往追駟
肅精神鼓舞千秋志盤銘萬古珍光湯

皇慎德兢業策臣鄰

其二 得身字

不及嚴防檢商王慎厥身藉之箴太甲亦若懍維
寅屋漏功無曠竿頭步有神駒光驚鹿鹿鴻業想
麟麟幾早秋毫察陰同夏后珍望洋雙目極踳堙
數言遵咫尺誥欽先哲鳩方笑後塵吾

皇起萬禩

聖德仰精醇

細雨垂楊繫畫船

得船字

細雨三春月垂楊萬頃烟橫塘開菴畫送客繫樓
船錦纜牙檣映蘆汀蓼嫩連翠迷芳草岸紅醉養
花天絮影空千里萍踪又一年鶯聲鳥榜外人語
白門前脈脈游絲惹依依別緒牽石湖吟孰繼

澤沐

鳳池邊

其二

得船字

無限離情繫垂楊細雨天詩吟揚子驛畫問米家

船流水懷前浦飛花似去年幾條紅板路十里綠
絲烟柔櫓驪歌答遙隄鷺影拳東風新鴨漲西舫
舊鷗絃繁響聞青笠閒心話白氈

液池欣作頌擬范富佳篇

松花黏鶴毛骨香

得黏字

山靜松花老雲深鶴夢恬烟霞高趣冷毛骨暗香
黏撫徑懷元亮橫江話子瞻縞衣風味別黃霰露
痕兼翠冷濤聲答青濃石髓添清芬疑篤耨微笑
悟華嚴綺麗桐翔鳳芳馨桂倚蟾何如

蓬島上卓立俯雞廉

秋末晚菘

得菘字

菜根香可掬天末又秋風飽飯供新稻嘉蔬說晚
菘清霜三徑外寒日一畦中菊影穿籬碧桃花點
醋紅羊蹄忘蹴踏牛肚想腴豐入傳冰壺韵參禪
玉版空芹殊吟杜老韭並記周翁何似鹽梅業調
元贊

聖功

其二

得菘字

木末秋烟碧畦邊晚照紅花香猶有菊菜把最宜
菘淡泊詩懷近腥羶世味空影寒驚去雁蹢躅話

肺能白露蒼葭地烹葵剝棗風佐應雲子米品壓
水晶蔥王儉詢徒切何曾飽亦同彥倫傳韻事卿
相俯江東

開門看雨月滿湖

得門字

菰蒲風作雨起看月當門夜氣開襟爽湖光滿目
存蕭騷撓玉笛空闊湧金盆珠箔寒無影銀雲淡
有痕翠疑帆葉濕白挾浪花翻急陣驚天籟涼波
淨客魂蒼生歸夢寐碧漢接淵源

大液歌游豫汪洋沐

聖恩

東風解凍

得風字

凍意全消解乾坤一氣中南榮欣化日東陸已祥
風林暖烟微漾泥香雪乍融蛟冰千片碎鵬路九
霄通波縠縈新碧塵絲送軟紅鶯花觀物候鳬藻
悟天工嘘植乘時助溫暾到處同

皇仁欽普被樂利頌無窮

謝傳東山

得生字

踏徧東山路常標謝傳名臣心惟白水女伎亦蒼
生洞古溪雲入堂虛嶺月明南樓高庾亮北渚話
袁宏支許看鴻舉淮淝笑蟻爭朝廷都小草勲業

偶新城燕寢圍棋樂雞籠拄笏情遺踪誰躡屐石
齒亂烟橫

治聾酒

得聾字

春酒粉榆社靈奇妙感通拚將今夕醉治得昔年
聾隔閼緣何事溫醇信有功一時消壘塊四達想
玲瓏豈似曹參飲兼成夏禹聰不須誇軟飽直許
豁羣蒙路已兜元關勲還益智同衢尊欽

聖世寰宇荷

帡幪

其二

得聾字

俗耳針砭久鶯啼曉樹紅酒香看賽社人坐話泊
聾宛似醍醐灌全教障翳空幾年深醞釀一旦快
疏通佛慧芭蕉展仙心琥珀融聞根眞雪亮飲興
肯雷同舊夢劉元石新吟陸放翁涵濡歌
化澤明達溯

宸衷

其三
得聾字

桑柘三春酒神靈祀社公能爲鄉里福未許世人
聾杯泛流霞碧爐疑點雪紅遑知醒與醉定使塞
爲通似藉馨香意全收滌盪功昂頭歡父老提耳

到兒童鶯好攜柑聽龜還紀杻同治平懷大略割
肉笑匆匆

其四 得聾字

社鼓走村翁靈音欲振聾神絃偕奏曲旨酒亦成
功是否名干日真如達四聰子懷銷抑塞汝聽得
宏通香或流涎易清疑洗耳同相誰誇面白醉合
笑顏紅有興醅醕洽無心滯礙空提壺花外勸消
息問東風

商山芝 得山字

翠繞商州路迢迢上洛山葛懷同向往芝采任躋

攀赤帝侯王外黃公伯仲閒療饑供嘯咏得味在
蕭閒嗜豈惟三秀餐廳是九還衣冠高漢代薇蕨
異殷頑羽翼青宮佐神仙紫府班含香麋鹿友泰
鹿笑塵寰

輕燕受風斜

得輕字

作態欹斜甚風輕燕益輕宛同虛以受直自御而
行下上音相和低昂勢不傾回翔纔水榭飄瞥已
雲程舞絮便來去飛花管送迎吹噓如與助暇整
肯居名門巷烏衣貴池臺綠草平鴻毛占順遇
御苑荷生成

吟梅閣試帖皆中年所作憶少時作秀才攻舉子業每
拈筆爲律詩尋舊藁大半遺失則以戊戌成進士後友
朋隨意攜去不能問其所在矣猶有剩者僅百餘首亦
零星抄出余舊以自怡悅名齋悉仍之以誌當年辛苦
焉耳佩蘅自記

